

四庫全書

集部

欽定四庫全書

元詩選初集卷十六

庶吉士顧嗣立編

紫藤花歌

并序

癸未歲三月二十八日宋賓客乘澤車過道宮
訪予時庭中紫藤花盛爛若錦擒道師蕭公邀
宋與予坐藤陰下尋友人張明之亦至酒數行
開口笑繁殊適然也宋因出名紙屬予作字一
春天氣不佳此日頗清潤可愛既援毫覺幽香

馥郁時集筆端放手喜書初不計其工拙也遂
話及樂天夢元九故事予曰二公雖神交如此
恐未若今日之樂衍也若取紫桐詩例賦長句
歌之以為他年林下一段奇事可乎宋曰吾子
便可承當遂率爾而作歌曰

竹宮瑣窓雲霧垂紫藤花發何歲蕤仙家駐景出異供
橫掩桃李無晶輝羣蛟奮勢力猶困鱗鬣不耐淒風吹
天孫夜擲紫霞被滿意下覆須春曦幽禽縮喙不敢啄

囚鎖恐泄蒼精機又如王愷紫絲障誇雄鬪侈光陸離
倒冠落佩衆賓醉臨風零亂千纓綫蚪柯扶疎散蒼翠
季倫擊碎珊瑚枝青宮賓客今園綺杖藜來扣仙人扉
遙驚紫豔翻華空造物乃爾爭新奇君不見香山老居
士夢與元九神交馳覺來清吟增悵望紫桐花下空懷
思何如吾儕時燕集對牀話久藤陰移興餘屬我埽牋
素爛柯不著山間棊刺簷入戶要學騰蛟螭鳥歸花落
香下來時集毫彩霑人衣一杯春露助香潤清氣貯滿

詩人脾依依青裊厨煙起好命庖人辦新美炷香供具

禱羣龍莫學癡藤蟠未已燕南饑民饑欲死

時普旱無雨二載矣

滹沱秋漲行

七月十日前次范家渡

君不聞蒙莊說秋水兩涘猶見馬與牛今年滹沱水大漲墟落濺濺生魚頭雲蒸老雨注萬壑上不少止下可憂馮夷不受土所制黑浪怒蹴鼃鼃遊望洋東視誇海若似憤蛙比跳躍井坎湫金行氣肅坎宜縮狂瀾不逐西風收東行我濟小范口水勢森潏方淫流秋禾盡為

魚鼈餌廬舍漂蕩迷田疇二年旱暵例乏食彼稷幸得
逢今秋嗟哉一飯到口角淪沒無望將誰尤河防久廢
不復古惟預捷治為良籌翻隄決岸勢不已雖有人力
誰能謀近年遇災幸無事其或成患徒嗟詆兩河農民
被災者逃避無所栖林丘夜深投宿聞聚哭悲聲暗與
蟲聲啾

平原行

至元甲申
歲正月作

羯奴騁兵傷濫恩天寶之禍將自焚三郎宮中畧不省

履霜有戒知何人平原蹇蹇真王臣沈慮久識幽營氛
泛舟從酒運奇畧一日樓櫓驚雲屯鐵轡南來從獵火
河朔風靡煙塵昏孤城平地獨與抗勇鼓義旅爭鯨吞
西開土門倚蛇陣南激睢守遮厓垠滔天腥穢思一掃
誓與此羯不兩存書生信能立大事竟掣賊肘西南奔
事雖曠代有足感魯公之義世所尊我來弔古增永慨
蒼煙草樹連荒闌欲尋遺廟不復見寶刻留在東方珉
栖蓋亭前野日曛平原城下酹忠魂朝廷何嘗容直道

志士蹈難甘捐身此心自視無愧已一時知否非所論
嗟予何者敢跂慕屢書不厭臬鸞分當年紀載兩鬼域
九泉奄奄隨埃塵先生一死固不朽雅操何翅同松筠
故應烈日秋霜氣千古堂堂凜若神

華不注歌

齊州山水天下無灤源之峻華峰孤秦鞭有力驅不去
天遣一柱標齊墟初疑太素女媧氏補天斷手茲遺餘
又如翠鳳翥郊藪來應世瑞開昌圖南山連絡雖可愛

未免阿附相承趨孤撐直上夾石碣猛視又似天門羆
慶封齊豹兩元惡哆齧猶露雄牙須不然齊太史寃血
凝碧老不渝化成直筆插天外堂堂使表春秋誅乾坤
乃有此雄跨未許鵲藥爭頭顱江山勝概儘軒豁遠客
吟眺增躊躇李白上天不可呼雲煙變化何須臾後人
摹寫觀天巧百匝空繞青芙蓉文章李杜光燄在有詩
無詩將何如我思齊晉迭雄長山靈枉被兵埃污桓公
九合猶霸事三周其下真非諛會須扶策凌絕頂望入

蒼梧叫帝虞

椒蘭怨

昭皇迫東遷望絕忠臣援堂堂鴈門兵抵足速禍變帝
酣長星杯醉魄迷椒殿神龍失水機上肉惡梟啄門夜
漏半龍興赤霧天為紅一竈三百皆皇宗唐家大業至
此盡自古亡國未有若此之哀恫梁王歸罪將誰給奴
輩雖誅天有在金祥殿空殺氣高賊珪白刃專相待

汜水行

五季權在兵逆順繫財賄同光當宁能幾朝牝雞司晨
傾內外添都買宴物山積盡入掖庭克內費君王政荒
優宦狎將相無辜恣誅殺蜀資百萬賊所傲縱有其能
供近渴一夫夜呼汜水東絳霄樓頭兵反攻雍陵竟墮
所好死英武杳逐仙音空先皇有識如相問三矢雖還
未克終

通漕引

漢家鼎定天西北萬乘千官必供億近年職貢仰江淮

海道轉輸多覆溺東阿距泉

清泉縣

二百八淪注西來與

清合安流取直民力省積水浮網纔兩閘自昔河防爭
橫議祇辦薪芻不勝計宣防瓠子至今悲以彼方茲功
極細役徒三萬期可畢一動雖勞終古利裹糧荷鍤去
莫遲行看連檣東過薊休說春潭得寶歌長笑韋郎空
侈麗從今粒米斗三錢狼藉都城樂豐歲

李夫人畫蘭歌

為郎中孫
榮甫賦

清閨堂深不知暑瑶草佳期夢玄圃孫郎笑折紫蘭來

素影盈盈映修渚李夫人澹丰容天然與蘭相始終刻
藤一筆作九畹落墨不減江南工芳安元與凡卉異晙
晙況是湘纍藂離騷不復作遺恨千古沈幽宮君看此
花有深意似寫靈均幽思悲回風君家大雅堂文彩東
野翁併入慘澹經營中秋風拂簾秋日長芳霏霏兮汜
崇光淡妝相對有餘韻畫欄桂子空秋香淡軒託物明
孤潔五十年來抱霜節固知色相皆空寂妙得於心聊
自適仿像湘娥倚暮花黃陵廟前江水碧生平佩服真

賞音升聞紫庭非素心喚起謫仙搖醉筆為翻新曲瀉

瑤琴

曲一作操

右夫人名至規號澹軒以宋狀元黃樸之女長適尚書李珣子早寡今年七十有二善畫蘭撫琴近為郎中孫崇父作九畹圖若與蘭為知聞也且自叙其後云予家雙井公以蘭比君子父東塋翁甚愛之予亦愛之每女紅之暇嘗寫其真聊以備閨房之玩初非以此而求聞於人也郎中以蘭省之彥一日來徵予筆遂誦點污亦何忍但覺難為辭之詩以應之孫求歌詩於予因樂為賦此者正取其節而不以其藝故也秋七月初吉

秋澗老人題

清霜怨

贈吳省參君璋

日落偶過吳郎家入門兩闌姚魏花金盤洗妝都幾日
已覺鬢亂釵橫斜韓卿秉燭惜佳麗便恐翠袖倚竹空
春華鶴翎紅糝玉蝶粉墮髻睡美吳宮娃我欲問花不
解語何故忽爾令人嗟東皇醉暑初不問青女潛妬飛
銀沙花神斂袂避陰慘駐顏何有仙人砂京師各圃花
不少今歲閒殺遊春車客懷豈獨被花惱俗事擾擾驚
無涯西風巷陌塵障面酒樓寂寂空簫笳我因未事得
閒在盡日飲客前溪芽天教世務不挂口遮眼幸有詩

書葩時時弄筆散幽滯錢裏忘計東坡又為花作譜見
衰盛自笑思澁頤空呀因聲寄謝紫山老落落高舉凌
青霞

湖中後怨至元十八年歲辛巳冬十月按事順德
晨起燈下讀沈下賢文集偶賦此或云鄭即子
春也

洛橋曉月光朦朧彼姝嬌啼橋水東鄭生蚤發與之遇
挈去勝御甘長終霧綃煙縠已懽悅九歌招魂皆楚風

一
朝謫滿與鄭訣云是蛟娣非凡庸岳陽樓高花映紅
滿筵歌舞鮫人宮海風吹散歛不見倚雲望入湘江空

春夜宴史右相宅

勳閥汾陽業金貂漢相家陽春元有脚玉度瑩無瑕神
駿推宛馬跳梁笑井蛙相逢成夜集暢飲厭流霞綺席
圍聲妓銀箏合鳳琶晚妝添粉黛雜舞見渝巴鑪暖融
螺甲盤香供露芽透空敲雨杖促節摻漁撾侑食增陽
盛紓懷發興賒舊聲今漸遠新體此無加樓轉三更月

燈垂半夜花歌長紫曲調獅猛奮須牙辭謝寧容退留

連暫樂佳直須窮薄

缺

尤異是雄跣登踏寒林判軒呈

迂古了侍筵更紀僕歸燭黯籠紗下客陪簪玉清吟擁

鼻瓜嗣侯非自樂先業念無涯待士無疎密籌邊靜譟

譁有時陳樂籍張宴為賓嘉此夕直儀鳳明朝等散鴉

寵光需北闕

時有進拜隆興省平章之耗又以二月七日先相忌辰約在汴京故第享祀故云

春禴動南衙豈特調銀字重看拜白麻轉頭雖契闊後

話足雄誇碧草傷淹賦清江弔屈沙別懷增惓惓獨鴈

漫啞啞霄漢嗟垂翼庭階愧倚葭情悠天共遠心在地
無遐會作登樓客聊停泛斗槎朱門三十載未分鬢空
華

謁武惠魯公林墓四十韻

金馭成陰朽山東自古疆限田標鎮戍積憤致搶攘武
惠當年傑天心霸業匡雲龍時際會風虎日翱翔五十
連城重三千戰士良一朝歸版籍遺愛在耕桑甫定先
文治來威戒伐張儉恭希大帛號令肅秋霜氣革耰鋤

擾風還禮義鄉頌方歌魯盛人賊墮星鐘雲出青崖頂
烏瞻泰岱傍驅車經鵲里故宅似汾陽山倚祁連冢祠
荒綠野堂門旌虛將幄燕寢尚清香有客追疇昔懷人
動慨慷王師初破汴河朔久淪網文物隨雲散招徠不
一亡盡收周禮樂重闢漢科章清秩銓華省羣英萃郡庠
有金皆冶器無玉不追章蓄德需明主流波及四方星
躔從落落奎彩獨煌煌嗣相圖光紹先猷在益彰雪山
宜久重世業寢丕昌帝道開中統皇風煽八荒重推黃

閣相輕是尚書郎兩署分荷橐千官列鴈行至今稱濟
濟所在見踳踳原治無多術推賢用巨量措材真得所
收效儘非常侯國能如此朝家化更皇闡明雖實理勉
勵之明揚一代徐通議中流號巨防試圖援手助潛有
跋胡妨薄宦新過魯諸生懼面牆泮田饒樂育師授奈無
望可惜絃歌地虛成苟在梁力扶雖切切事迫去遑遑
量分功名薄傷時涕泗滂野煙知客恨先自柏城蒼

靈巖寺二十六韻

中土論名利茲山第一巖地靈連海岱境勝隔仙凡紺
殿通虛閣丹崖間翠嵐天低神寶嶺佛出證明龕鷄警
陰魔暴僧馴怒虎眈定師興寺始黨刻不辭慚石狀殷
公怪眉龐老衲耗鐘聲盤絕壑幡影走枯枿法護雙櫛
樹經巖七寶函巢棲松鶴赭茗淪露泉甘花雨濛沙界
巖團抱碧潭布金仍趙魏仰食不耕蠶富覽山無盡幽
尋力不堪微官嗟縛律小隱欲投簪吟就籃輿往禪思
玉版參靜緣天或假世味苦相諳城市蛙居坎功名蟻

戰酣有來求福利誰復減嗔貪風化吾儒在慈恩釋氏
覃教崇緣世主風靡過周南以此山林勝皆為佛老探
茲遊聊適意他日儘橫談翠琰詩如此清吟口詎緘顧
瞻因咄咄前後至三三山主留昏宿官程畏衆暑夕陽
人影淡猶惜動歸驂

送李郎中德昌北還情見乎辭

一自新河別經今已十年為尋江表傳重會嶺南天鴻
鵠乘風健驂驢得路先鷄香芬省署襟誼動星躔洒落

生平契留連祖送筵自嗟衰病客愁臥瘴江煙歲月鄰
期耄鄉闕近五千依依枝遶鵲跼跼水飛鳶外望何其
切中堅未易鐫崇高疇弗戀筋力若為前落日鄉音杳
秋空望眼穿委心歌已矣適意俟終焉行止雖存數周
旋正賴賢省臺公道在萬一故人憐

番禺杖

異種來番國知名自老坡杖才任操倚節目喜摩挲尺
度天然足柑黃氣色和奇姿含海霧孤植映江沱物眇

離鄉貴材稀審實訛聲音鏗爪甲鱗介訝蛟鼉鞭馭真
雷策批亢格魯戈重輕欣得所長短稱閒拖扶老携行
便持危得力多金蛇僵自勁鮐背痒忘苛不自浮槎使
來從老伏波見歸情鄭重未許老婆婆入手嗟神物傳
看駭玉柯支頤看月出橫膝伴詩哦選勝尋泉石窮幽
入薜蘿有時兒女觸却恐鬼神呵蓋節空筇竹神鋒黯
太阿笑揮堪解虎靜倚可降魔靈壽輕無賴梅條皺可
接花藤昏玳暈斑點慘湘娥桃竹那能比枕榔未足歌

望塵甘却立，斂跡總無過。用舍時當審，敲撞責果何。更防雷雨夜，衝屋學陶梭。

題常仁卿運使西覲紀行二首

九萬鵬搏翼，孤忠駕使軺。功名元有數，風雪不知遙。抵北踰鰲極，維南望斗杓。胡生搖健筆，且莫詫東遼。

出五代史

突厥附錄同州郃陽縣令胡橋忘歸中國作陷虜記

三策條民便，逾年致節旄。夢驚羊胛日，嶮歷幻人刀。碧盃昆堅異，黃金甲第高。白頭書卷裏，留滯敢辭勞。

秋夜

卧榻鋪筠簟風簷遞晚涼雲枯涵旱氣星爛射寒芒鐘
鼓寒更永乾坤夜色蒼時危關百慮低首拊空牀

星子鎮道中

北下星闌道川開百里寬夢殘傾錦恰吟細緩征鞍土
峽深回洞山田疊醺壇一杯亭傳酒來為敵霜寒

田間

斜日秋瓜圃雲間雨過初平疇交晚吹涼意滿輕裙草

木浮元氣河山擁草廬拊心欣有得重展故人書

午憩陽城北龍泉寺

倦客鞭催急龍泉一解鞍在家貧亦好行路古來難寺

古松杉老山空水石寒萬松亭廢久重拂短碑看

碑大定間

澤州刺史楊庭秀撰真奇作也

清苑道中

野店春風裏行人避繡衣
紉華寒有暈山日慘無輝
孤

隼梢雲下羣鴉結陣飛
驚鷗無遠泛事外本忘機

又作澄清

吾有志天
意肯從違

辭長樂先壠 并序

己丑歲秋九月二十六日將赴任福唐拜辭長
樂先壠歸宿野竹趙氏田舍且喜聞村之故名

因有是作

謂野竹
為野豬

展墓過農里銜恩使遠方氣隨天北轉人與鴈南翔肝
膽孤忠在江湖去路長此回當自信不必泥行藏

望舍弟消息

憶弟居穰縣嗟予宦建陽三書曾未報一別漫相望喜
信占晨鵲清吟夢夜牀殘年能幾許長與汝參商

高郵道中

築甬餘三百灣環護漕溝重橋穿寶應一岸入高郵水
陸開亭轉烽煙靜塞愁腰纏無十萬官遣上揚州

望嶺

谿嶺無千里崎嶇半月間事機須勇退天意許生還順
處從多厄趨時免強顏越禽忻我往長路語闌關

首夏家居即事二首

懶情從鬢鬢披衣任曳裾都忘身外事貪讀意中書
比老心能爾雖貧樂有餘繞園欣細履樹影綠扶疎
竹茂資泉潤花榮藉圃沙鈎簾來舞燕鎖樹護栖鴉
客至留酤酒吟長待煮茶幾時容却埽一向似仙家

和仲常牡丹詩

三月二十三日飲中作

漢殿承恩早金盤薦露新色酣中省樂香重錦窠春
儘殿羣芳後誰辭載酒頻清如司馬相也作插花人

大行皇帝挽詞八首

并序
錄四

至元二十一年歲次甲午正月廿二日癸酉夜
亥刻帝崩於大內紫檀殿既殮殯於蕭牆之帳
殿從國禮也越三日乙亥寅刻靈駕發引由建
德門出次近郊北苑有頃祖奠畢百官長號而
退臣憚職在詞館追思不已作挽詞八章庶幾
鼎湖攀髯之意其詞曰

灤水龍飛日長楊羽獵時天顏凡五見雨淚遽雙垂化

日中天赫陰靈萬國馳何由知帝力耕鑿樂雍熙
威破羣雄膽恩藏四海心聲明三五盛垂拱九重深國
論多儒斷天機入睿臨小臣勞面識無路洒松林

去歲回鑾輅旌旄擁萬靈今春辭畫翬弓劍闕泉扃

宸虛瓊島雲龍慘帝庭

是夜殿庭間有光燠
若燈燭然良久方散

詞臣思

補報淚濕簡編青帝系三宗上麟經一統尊火盤承正
據虎落入雄吞窮薨南交獸奔騰北海鯤不教擒一索

遺恨付皇孫

望淮

朝日慘無色昏昏水氣間到淮猶數里隔岸見尖山

夏夜

庭竹影扶疎清風晚騷屑夜涼人未眠卧看窓間月

夢中得

持酒濯利劍青蛇光黯然金鞭鞭駿馬汗血沾錦韉

披襟

涼風東北來蕩盡中夜熱起視河漢星微雲淡明滅

送王嘉父

新知雖樂道彌親樽酒燈前便故人時宦儘從閒處著
浩歌還愛醉時真紅蓮幕府名無隱春草池塘句有神
恨煞百門山水錦波流不到東秦

清明日錦隄行樂

浪說蘭亭禊事修年年春好錦隄遊花翻舞袖驚歌板
柳隔高城暗酒樓綠樹恐應春事老金鞭重為使君留
竹西路晚歸時醉何處珠簾半上鉤

南城納涼晚歸

書院歸休日已曛
南城風細晚相親
坐來近市喧初息
歸到衡門夜向分
矮榻趁涼欣稚子
疎燈留影伴厨人
一杯粥了從高卧
須信閒身等策勲

送蕭四祖北上

丹鳳銜書下紫庭
秋宵光動少微星
蒲輪再起秦遺逸
天意將新漢典刑
長策正勞黃屋夢
故山從使白雲扃
中原有幸經綸了
天外高鴻本自冥

雨中與諸公會飲市樓

每恨人生會合難興來一醉盡君歡
雨沾翠佩簾花細酒凸金杯飲興寬
胡旋舞低翻翠袖串珠喉穩怯春寒
朝來酒醒蓬窓下依舊春風首宿盤

自適

旋收柏實炷爐薰紙帳低垂自有春
竹几隱眠無俗夢蒲團容膝勝華裯
窓間白日驚濤迅門外黃塵萬事新
幸與聖賢相晤語未辭藜藿此生貧

哀故宮

掖庭依約粉垣丹行入荒宮重黯然
華表忽驚人世換
昆明重見劫灰寒
石龍委地埋秋草
湖玉臨池倚暮煙
滿目悲風吹酒醒
東華門外淚闌干

登凌雲閣

布衣塵滿戴儒冠
風袂來登上將壇
棟藻雲飛朱戟濕
簷牙霜重玉梯寒
風煙遠勝籌邊迴
氣勢雄吞汴水乾
經畧江淮有成策
不須重展地圖看

銅臺懷古

都邑盤盤據四衝登臨形勢覺天雄
歌樓暖響春風細綺陌香銷寶氣空
笑著孱王承宋弊至今姦孽擅唐終
憑高誰識神州恨付與衡漳日夜東

鎮州懷古

趙武雄圖不可尋風煙東接九門深
炎涼到此分南北戰伐無情自古今
彈躡流風猶戰國椎埋遺俗帶燕音
劒歌不遇平原客落日滹沱動旅吟

燕城書事

都會盤盤控北垂當年宮闕五雲飛崢嶸寶氣沈箕尾
慘淡陰風貯朔威審勢有人觀督亢封章無地論王畿
荒寒照破龍山月依舊中原半落暉

夏日南堂即事

一雨清涼恰四朝霧絲縈戶見蟪蛄病因戒酒成真止
辭免書門絕妄交道拙尚憂免墜簡家貧且喜稼盈郊
間庭綠蘚泥融徧燕子飛來補舊巢

送王子初總管奉詔北上

聖代崇儒意匪輕，徵車相望半諸生。
九天雨露思賢相，十載經綸見老成。
更化有方先定制，揀時無驗是虛名。
煙霄未遂攀鱗志，葵藿空懷向日誠。

開平晚歸

七月一日
授翰職

龍首岡邊野草深，秋風灑水動歸心。
百年蓬巷開圭竇，一日恩光照士林。
吟鬢有光浮鏡玉，家書封喜認泥金。
料應曉月簾櫳底，乾鵲飛來報好音。

賦西域鸚鵡螺杯

老月淪精射海波珠繩分秀貫神螺鷗斑漬粉垂金薤
鸚喙嫌寒縮翠窠樽出瘳藤紋浪異瓢成柳子腹空皤
飲餘疑與溪娘遇一笑相看發浩歌

宛葉道中

六合雲蒸一氣靈漫漫長路渴生埃詩從白雨明邊得
人自青山盡處來世路有機難預料劇談供笑不時開
濟時賴有諸君在漢苑秋風愧不才

次宿汝樓韻

微雲河漢半晴陰
夜景蕭森夢化城
山色不隨喬木老
月華偏對故人明
鶴緣露警清無寐
蛙屬官居重有聲
廊廟只今紛治具
正容堅坐看昇平

臨武堂讌醉後有懷省臺諸公

桂月流光雪滿臺
月明人影兩徘徊
行雲不逐歌塵散
往事還隨去鴈哀
雙鬢入秋無可白
寸心於世未全灰
遙憐紅藥堦前客
玉樹相依一笑開

夏縣道中

濕雲壓樹際岡平溽暑還因小雨增官事困人如縛虎
秋風吹野夢翻鷹趨時未必儒冠誤並隱端為野鶴憎
遙憶筠溪亭下水萬竿蒼雪照吟燈

餞陳簽省行臺西夏

漢家威德際髦鬢牙孽其中慮阻艱金節遠開丞相府
春光先渡玉門關正煩煙火通青海未用梯航致白環
銀字詔還知不遠好來彈壓紫宸班

題趙宣撫樊川山中雜詠

蒼崖如削靜煙霏中有高人住翠微
夜鶴聽琴依蕙帳曉泉和月落山扉
一龕靜體炎涼理兩眼深明倚伏機
畢竟名高難久卧野猿偷褫芟荷衣

至元七年庚午奉陪憲臺諸公闕下賀正口號

盤盤帳殿敞彤庭天仗宵嚴擁萬靈
玉筍東班分列辟龍墀首拜認前星
煙蟠鼉柱霑吟袖樂泛仙音近御屏
歲歲大酺恩例溥自慚虛薄仰皇局

同馬才卿暇日登昊天寺寶嚴塔有懷

高標直上跨蒼穹
物外方知象教雄
九陌市聲開曉色
兩都喬木動秋風
遙憐漢馬屯湘渚
安得長書附塞鴻
寂歷村墟野煙外
誰家簾幙夕陽紅

追挽元遺山先生

大奎騰彩憶光臨
孺子何知喜嗣音

子年廿許以時文
贊於先生公喜甚

親為刪誨且有文筆重於相權泰山微塵之說即欲
挈之西行以所傳畀予以事不克至今有遺恨云

党

趙正傳公固在陽秋當筆我奚任天機
翻錦餘官樣月

戶量工更苦心野史亭空遺事墜荒煙埋恨九原深

西苑懷古和劉懷州景融韻

彩鳳簫聲徹曉聞宮牆煙柳接龍津月邊橫吹非清夜
鏡裏瓊華總好春行殿基存焦作土踏錐舞歇草留裊
野花豈解興亡恨猶學宮妝一色勻

踏錐舞名見景元
所錄金人遺事

糟魚

霜刀截斷玉腴芳暖貯銀罌釀粉漿錦尾帶頰傳內品
金盤堆雪喜初嘗解醒未減黃柑美雋味能欺紫螯香

一筇饜餘乘醉卧夢橫滄海聽鳴榔

過沙溝店

高柳長塗送客吟時驚時序變鳴禽清風破暑連三日
好雨依時抵萬金遠嶺抱枝圍野色行雲隨馬弄輕陰
搖鞭喜入肥城界桑柘陰濃麥浪深

山陽偶與大繼長相遇自辛亥年相別至今廿八
年矣追念疇昔作詩為贈

解鞍林下振清埃懷抱樽前得好開白髮滿頭心事在

青山當眼故人來，風流自有高賢識。感慨還深，漂母哀

讀盡深香轉蕭爽，清吟不到伯倫臺。

深香係繼長父宜之文集，號曰深香。

間適予此行，本擬遊百巖，不果，故云。

種玉亭

徐子方宣慰有詩，因擬作。

靈沼雲深寶氣存，素蕊一夕發芳根。煙中髣髴溪娘語，
波面輕盈越女魂。江月借妝增皓彩，露華和屑貯芳溫。
夜深更待瑤環供，細挹秋香共一樽。

桃花菊

一名胭脂紅。

淚洒明妃寄露葩換根非為貯丹砂黃輕白碎空多種
碧爛紅鮮自一家騷客賦詩憐晚節野人修譜是頭花
九秋霜露無情甚時約行雲護彩霞

秋懷

醉頭扶起日三竿埽罷幽軒到藥闌傍架整齊書帙亂
繞籬料理菊枝殘日融虛閣留餘暖雨積高空促早寒
處置身心閒裏過不將勲業鏡中看

丁亥歲十月十日夜夢乘船渡一大河既濟望南

岸一閣高數百尺窓戶北向自簷至地上下以
琉璃大簾垂蔽翠色半天甚奇麗也

雲間高閣翠為簾疑是仙居擁衛嚴虹影蕩搖青帝闕
海風吹墮寶陀嵐半空倒景驚奇絕千丈搖光入顧瞻
我自平生多異夢似憐方朔詫雄談

清明後一日雨中招林韓李三君子小酌且為梨

花洗妝

時新植梨花
一株盛開

花滿金罍酒滿樽一杯歡飲得佳賓近年樂事無今歲

此際閒身有幾人
祿美勝於三品料
臘香清徹六根塵
風簷數點催妝雨
瓣與梨花作好春

海棠

桃李無光分落英
海棠姿色占春榮
雲鬟綠擁妝初罷
醉臉紅勻睡未醒
任使無香真可意
放教千葉更多情
光風流轉都能幾
莫惜沙頭倒玉瓶

小園卽事

小園清潤稍堪觀
翠有庭筠馥有蘭
未放薔花金作蕾

已開梨蘂雪為團
烏欣有託扶疎樹
客喜來憑詰曲闌
深院日長須細履
也勝愁坐兩眉攢

儀封道中

驛館殘缸曙色分
馬馱殘夢走踈踈
去家已遠誰為侶
到處相逢有故人
健羨鵬盤慚始擊
靜便蠅蟄返求伸
一杯拜酌睢陽廟
激懦扶衰尚有神

西湖

西湖三面簇青山
淨拭菱花照翠鬟
蒼海月寒龍穴露

彩雲仙去鳳簫閒無多樓觀猶圖畫最好風煙近市闌
鄭重繡衣周漕使畫船春酒待予還

三山元日

臺榭天香簇絳紗三山簫鼓樂年華竹枝歌後多淫祀
燕子歸來識故家荷鬢開妝餘翠貝蔬盤勻飮雜魚鰕
殊方風物雖堪賞爭遣衰年客海涯

近讀夜永不寐等作覺清而頗寒吾恐傷中和而
病吾子也因復繼前韻假辭而薰炙之亦晁補

之擬騷之遺意也

燭影紅搖夜色侵香添菱葉鬱重衾鳳琶調軟歌能合
竹葉杯深醉易沈綠鬢追歡燕市樂翠屏歸夢越江吟
平明剩買扶頭酒不向諸兒計橐金

佛狸詞

在瓜
州城

江山照眼舒清眺千古興亡墮眼前瓜步市長連野戍
佛狸祠古慘荒煙柁樓看取平吳日父老空傳飲馬年
此日不須開濁浪好風都屬往來船

琉璃肺

擊鮮為具樂朋簪
辣品流馨漲綠沈
犀箸喜辛忘海味
霜刀爭割快牛心
四筵談屑霏餘烈
一縷冰漿濯素襟
勝過屠門矜大嚼
夢雲飛繞蹄林深

一作陰

題香山寺畫卷

送客當年過玉泉
醉中遊賞得奇觀
一泓湛碧浮僧鉢
幾葉秋黃打石闌
山色空濛金界濕
松聲清泛海波寒
吟鞭回首都門道
斜日歸時翠滿鞍

送舍弟南歸穰下

壬辰十月廿日
彰德相別

相思渭北常年事，遠送漳南恨別心。
沙暖暫聯鴻鴈序，霜寒淒斷鵲鳩音。
兩鄉健在都能幾，千里含情老更深。
慰浣此懷知懇切，不教消息到浮沈。

德壽殿玉方池硯

理宗所御德壽殿為太上皇後所居殿緝熙講經殿也硯即碧

綠歟

玉斲坤形靈四溟，丹書猶認壽宮名。
紛紛落墨騰蛟霧，淅淅秋風拉瑟聲。
神物不知崑火烈，碧絲今對玉堂卿。

眼中多少興亡事白髮孤臣最愴情

當時同僚承旨留中齋學士劉東崖

侍讀趙方塘
皆宋人也

送總統佛智師南還

師姓積寧氏名沙囉巴華言為吉祥慧也西番人

白足毗耶不易逢鬚絲禪榻偶相同
經來震旦三千界人在天龍八部中
滿送酒船浮北海細薰香霧供南豐
江東父老催飛錫要沸潮音與海通

謝徐容齋贈梅

燕釵宮額蠟妝勻夢繞羅浮雪裏村
持贈一枝遮老眼

淡依疎影度黃昏風流燈下佳人面
瀟灑吟邊竹葉樽
我老忘情被花惱曲屏深鎖惜芳溫

夢昇天詩

并序

庚子春正月壬午日夜夢天風吹來星漢未曙
梯雲上征極天宇而止予倚雲下視倒景四垂
滉漾滅沒有不可望焉者既而覺清寒逼人神
思飄揚毛髮為森豎也遂躡空而下道宮與張
仙翁遇良久出翠帟紫端相遺而悟聞夜漏下

廿刻矣予平日異夢甚多皆莫之比因作詩以記其祥

沈沈玉漏三更後鵬背扶搖九萬搏
彤管夢傳江令筆紫袍歸抱上巖端
蒼冥赤日瞻天近碧落銀河照眼寬
欲躡帝關誰汝畫九霄風露不勝寒

西池幸遇詩

并序

壬午歲十月十二日某以承華事略求見引見者工部尚書張九思已刻拜太子于宮西射圃

內比前命近侍趣入者再既見問秦始皇何如
主某以所行過暴為對太子首讀明分篇問漢
成帝不能絕馳道事喜甚至輟射乃閱悉問明
分篇主意張九思珠勒呼乃略為應對讀畢以書
付董巴古會靜時細聽未刻賜酒霑醉而出

射殿風清已午間曳裾挾策拜龍顏首詢帝子龍樓召
喜輟犀弓偃月彎葵藿儘酬承日志簡編不負半生閒
滿樽春露霑恩處光動西池玉筍班

洛中吟 并序

近讀邵氏所書洛中雜事撫卷三數令人有不
能已者嗚呼五代間亂離相繼其否極矣生逢
茲辰一何幸哉故孫樵有生恨不得為太平人
良有以也因效康節謝溫公買園詩格綴集所
見賦洛中吟一篇其辭曰

萬方文物洽堯雍若論聲明極土中地自水南連洛北
治從真廟到神宗總將六合清明氣散作三川禮讓風

道統有傳程邵在勲名無比富文崇棚車載酒都人賞
名教傳家習俗同花木四時春不老耕桑彌野歲長豐
三千步障家雖侈十二行窩樂最融春酒泛香沽翠幙
夜花和露買筠籠小車高閣期真侶魏紫姚黃擅化工
愛育總歸君父聖論思不出廟堂公荆舒變法無期月
社稷垂亾到一空讀罷適然清興遠一簾花影曉光紅

一作讀罷窈然還復
感斯民何幸此何窮

遊瓊華島四首

中統元年作

蓬萊雲氣海中央
薰徹瓊華露影香
一炬忽收天上去
漫從焦土說阿房

躡盡寒雲最上層
土花春碧夢觚稜
江山如畫人空老
更倚殘陽望道陵

玉樹歌聲繞北虛
朔風吹恨入南都
六鼇不戴三山去
留與都人泣鼎湖

光泰門東日月躔
五雲仙仗記當年
不煩細讀江南賦
老樹遺臺倍黯然

梁園對月

兒時曾住汴梁城二十年來重此行
一片鳳凰池上月
向人還似舊時明

夏夜

野雲明處電飛光
海牽青浮落日黃
想得近山多雨過
滿庭風竹月波涼

春夜獨坐

讀書聲歇燭華殘
潤入琴絃覺夜寒
寂寞小窗雲影薄

隔簾梧葉雨聲乾

仙遊曲五絕

錄二

庭竹無人綠滿窓幽香和露濕霓幢日長孤絕壇邊鶴
啄徧晴苔影一雙

金簡朝元擁玉華碧壺香滿謫仙家石壇冷挂銀潢水
會待秋風送客槎

同劉勸農彥和葛縣令祐之遊蒼谷口四首

四山遮盡外來風山崦人家不覺冬獨立蒼崖重回首

山形渾似入居庸

九龍分部中天雨何處癡蟠睡不開一勾鳳凰臺下水
有時風雨洗天來

方山忽斷兩崖開中有蒼河自北來行出山門俱不見
玉龍翻作地中雷

地爐火在壁燈昏睡覺山堂笑語溫豆粥一盂官事了
緩搖吟轡出山門

遊霖落山雜詩二首

東山削出翠夫容，西壑硤研貯雪風。
人說魏王曾避暑，殿基猶是舊離宮。

滴乳巖前挂瀑流，青林飛洒動高秋。
玉龍躍入青冥去，堆疊蒼煙萬壑愁。

遊棲嵒寺三首

翠嵒回抱鬱蒼官，絕境軒橫杳靄間。
老矣瑞峯寺僧名應

健在護持長伴八龍閒。
字文周，末年大禁釋教，有曇延師者，遊隱北山，久之有樵叟，日

來聽經，后師道成，復有七人者來師問，故曰予八人皆龍也。其一已傳師教，故予等亦來受戒。

一徑縈紆入杳冥望川亭迴夕陽明欲知眼界寬多少
放出秦川似掌平

層巖重倚尚斜陽山下風煙一漫蒼恨煞愛山王老子
不來同宿贊公房

清明后一日作

懊惱春悰困宿醒偶隨遊子到溪亭多情幾行城南柳
三度春風見汝青

關山秋霽圖

望京樓上晚凭闌長記居庸八月還一段紫煙吟不盡
枉分秋色與南山

題張夢卿雙清圖

淡妝疎影兩依依點綴橫斜畫總宜恰似孤山籬落畔
小溪如練月如眉

禹廟

大地河山繡錯明野煙孤廟枕荒城杜鵑饒舌知何事
血灑東風怨未平

澤潞卽事雜詩三首

自古徒兵澤潞雄
選齊尤見四周公
堂堂氣與輦聲壯
閃閃旗翻日脚紅

角聲催日上牙城
白羽風清坐閱兵
盾鼻恐煩磨檄墨
莫教華髮等閒生

一檄風馳萬有降
天兵開國古無雙
寄聲壁月瓊枝客
鐵鎖休誇一葦江

遊青蓮寺

上方曾閣倚晴煙
回合諸峯聳碧蓮
午枕不容詩夢就
天風吹雨下危顛

顯宗墨竹

離離香粉淡爭妍
莫作荒寒景趣看
絕似承華宮檻畔
春風和露濕闌干

聞方響

時過一宅第

丁東鏗戛碎瓊琳
掩盡朱絃竊眇音
花外粉牆遮不斷
珮環清徹洞房深

春江獨釣圖

前金平陽人孫子
安筆十三科皆工

渺渺春江碧若空
一絲斜裊釣壇風
富春莫擬幽棲穩
已在君王物色中

題煙江疊嶂圖

楚水吳山萬里秋
風帆吹飽北來舟
應憐滿眼新亭客
空對江山雙淚流

山行雜詩二首

太行元氣老洪濛
草樹風前帶潤容
山色只宜差遠看

近移空翠上高峯

西來遊宦半忙閒
六日迢遙道路間
回轉羊腸二百里
天教馬上飽看山

毳幕卓歇圖

牙旗風軟馬蕭蕭
渭水歸來氣更豪
想得龍沙西北道
際天秋草黑山高

韓幹畫照夜白圖

纓紱騶衣一色紅
玉華光照苑門空
昭陵六駿秋風裏

辛苦文皇百戰功

滕王蝶蟻圖二首

劉侍御
家藏

槐壤紛紛事暫歡
枕中栩栩伴周閒
丹青欲識滕王意
須著人間比夢間

粉香金翠夢能甜
細寫春棕入筆尖
却恐尋香飛便去

六宮爭下水晶簾

王建宮詞有傳得
滕王蛺蝶圖之句

萬壽節同宋太常弘道出左掖
門口號五首

禁漏穿花夜已央
宮槐籠曉色蒼蒼
殷勤一點東華日

先到紅鸞扇影光

隔夜端門分板位
平明簪笏列鵷行
紫雲低覆千官拜
潤入金爐百和香

羯鼓聲高吹管清
九天合作鳳鸞鳴
侍儀贊唱三成後
磬折齊呼萬壽聲

花映巖廊近紫宸
宮官行酒過三巡
共携滿袖香煙出
散作都城十日春

對品班分玉筍行
一時望拜殿西廂
百官燕出宮闈靜

疎雨濛濛濕建章

題樂天不能忘情圖二首

病來心事轉蹉跎
身外猶嫌長物多
況是春歸留不得
侍兒無用蹙雙蛾

青衫憔悴老江州
放逐歸來萬事休
有醉吟情未減
又翻新樣柳枝愁

汴梁清明

連日風沙此日晴
東君有意作清明
垂鞭醉入宮城去

一片傷心畫不成

寒食日過隆德宮

當年陸海駭珍藏此日繁華墮渺茫
春草不隨人事換依然分翠入宮牆

宮井

清時瑤殿引瓶金百尺還聞墜水音
想得日長宮閣靜玉盤珍果看浮沈

武元直雪霽早行圖

和謝
宣慰

雪擁天山六月寒，冷雲西北是長安。
行人馬上揚鞭喜，猶勝南荒作熱官。

庚辰歲人日前一日書夢中所見

碧樹翻香滿洞春，一聲長笛隔花聞。
似嫌燕語鶯吟碎，暖噴宮音過夢雲。

小桃

梅粉飄零柳未煙，一枝春色獨常軒。
今年盼得紅苞折，風雪禁持第幾番。

周文矩勘書圖

宮槐陰合玉堂清
書葉翻香入細聽
內苑近來遊宴少
太平天子要傳經

樓居春望圖

翠斂雙娥底事愁
不緣春去落花稠
歸鞍未得朝天信
望斷東風燕子樓

遊百家巖雜詩

月池懸溜落蒼窪
巖竇分居可百家
不羨碧瀾秋色好

倚天驚絕赤城霞

太一宮

庭樹瀟瀟綠滿廊日長深鎖碧窓涼
隔簾遙見秋來處
一葉輕黃墮井牀

玉堂閒適圖

醉岸烏紗殿影東宮花低映酒波紅
興來草罷長楊賦
獨占高槐灑晚風

莊宗橫吹圖

郭相西征奏凱還阿嬌歡寵鏡交鸞却嫌暖殿春風燠
玉管橫翻曉吹寒

細君崔氏哀辭二首

去年扶病上新塋歌管杯盤水曲亭今日重來人不見
杏花零落柳條青

蘭枯蕙槁不禁風一夕吹香入殯宮把酒試澆橋下水
不容將恨到湘東

潤州

甘露寺近為
火焚埽地

望空北顧無雙寺行入西津第一州江影隔山搖素練
行雲和夢鎖朱樓

白峯嶺

儀曹苦厭為山囚霧障煙屏看未休行過白峯三十里
桐廬江上重回頭

蘭溪縣女步道中

豫樟蔽日無黃落竹筍經霜更碧鮮記取江南光景異
暖煙晴日是冬天

全氏小樓與南山相對殆几案間物也暇日觴予

其上索賦鄙作因口占三絕句

錄二

間閭撲地不容閒疊起重棚翠靄間樓下市聲喧午枕
藥爐頭上看青山

東籬遙見喜悠然況在風煙咫尺間滿勸銀杯留客醉
夕陽佳處鳥飛還

予自閩中北還舟行過常秀間卧聽櫂歌殊有愜
予心者每一句發端以聲和之者三扣其辭語

數淺而鄙俚曾不若和聲之驪亮也因變而作
十二闋且道其傳送艱苦之狀亦劉連州竹枝

之意云

錄五

今秋湖濶兩相通差遣雖頻力易攻度險却防連夜發
源流還怕打頭風

兩浙人稠不易安少罹凶慄即流遷今年苦惱蘇常地
易子營生不計錢

朝來回棹喜空船坐唱吳歌踏兩舷淘米墩頭風浪起

最防吹入太湖煙

岳江灘石苦經過音節聽來燥未和不似吳儂音韻美
遺聲全是竹枝歌

幹當江南有許多往還冠蓋似攬梭因茲力役無朝莫
欸乃翻成懊惱歌

題劉總管宅御愛峯

太湖清潤岱宗雄金字宣和第一峯絕似水晶宮裏看
一堆寒碧玉玲瓏

龍虎臺二首

翠華行殿拂明開
北狩南巡此往迴
長憶先皇重詞翰
玉堂今歲幾人來

山靈拱護走風雷
萬馬雲屯駐漢臺
今日鼎成弓劍在
西風吹淚不勝哀

廿不刺川在上都
西北七百里外董
侯承旨扈從
北迴遇于榆林
酒間因及今秋
大獮之盛書六

絕以紀其事

錄三

千里陰山騎四周休誇西伯渭濱遊今年較獵饒常歲
一色天狼四十頭

今年大獼蹄林秋青兕黃羊以萬籌搖吻戍兒欣有語
好雲從此到南樓

今秋天餉住冬糧萬穴空來殺氣蒼渴飲馬酮饑食肉
西風低草看牛羊

題錢舜舉畫梨花

掖西千樹開春華莫把芳容帶雨誇看取一枝橫絕處

洗妝還是漢宮娃

疎梅寒雀圖

長記扁舟過武夷仙家梅竹滿清溪
山禽盡日憐幽致爭揀寒枝趁晚栖

枯木寒鴉

枯樹寒梢凍欲冰野鴉翻影若為情
錦鳩呼雨煙林外紅杏香中過一生

農里嘆

并序
錄四

至元廿八年九月檢視水災趙之東偏自平丘
至劉村渡凡一十一處因老農問答集為十絕
句庶以見農家有終歲作苦卒至于無成者可
哀也哉作農里嘆其辭曰

今歲馮夷勢蹇驕漫流西岸不知遙枯槎聚沫猶然在
時見田間擁樹腰

浚水南來接北滹兩河會合泛田廬官來檢驗承尊重
所望申圓得早除

每年秋漲賴橫堤水縱漫堤害尚微近為鹿城偷堰破
放交流潦到柴扉

穀穗虛穰草色熏滿前堆積漫如困一餐到口還無濟
辛苦田間力稼人



元詩選卷十六